



Nota de prensa

Xueves, 26 d'avientu del 2024

El Principáu adquier la correspondencia privada de Severo Ochoa ente 1947 y 1977

- Les 160 misives rellaten la vida íntima del investigador asturianu cola so esposa Carmen García Cobián mientres 30 años
- L'Archivu Históricu d'Asturies va acoyer esti fondu documental p'asegurar la so protecció y espardimientu ente la ciudadanía

El Gobiernu del Principáu d'Asturies formalizó l'adquisición del epistolariu priváu ente'l premiu nobel de Medicina Severo Ochoa y la so esposa, Carmen García Cobián. Esti conxuntu documental, compuestu por 160 cartes intercambiaes ente 1947 y 1977, va pasar a formar parte de los fondos del Archivu Históricu d'Asturies depués de les xestiones efectuaes pola Conseyería de Cultura, Política Llingüística y Deporte, garantizando asina'l so caltenimientu y l'accesu de la ciudadanía a esti importante heriedu.

La consejera de Cultura, Política Llingüística y Deporte, Vanessa Gutiérrez, destacó qu'esta adquisición "forma parte de la política d'esti Gobiernu pa la recuperación y puesta en valor del patrimoniu documental nel que ta conteníu la memoria de les persones". Nesti casu, "la memoria de Severo Ochoa y la so familia, dando testimoniu de la so vida y la personalidá del científicu que fixo historia coles sos valioses aportaciones nel campu investigador, pero a quien agora vamos poder conocer meyor na so faceta más íntima y personal", afirmó la consejera.

L'epistolariu, consideráu d'altu valor patrimonial y cultural, documenta'l día a día del científicu y la so esposa nos periodos nos que los compromisos profesionales y los viaxes de trabayu calteníenlos separaos. Ente los documentos inclúyese tamién una carta fechada en 1925, escrita por Carmen de Albornoz, madre de Severo Ochoa. Calteníes na so integridá orixinal, estes cartes denominóles el mesmu premiu nobel como correspondencia sentimental, una designación que refuercia'l so calter íntimu y personal y l'interés del Principáu por caltener esti patrimoniu documental n'Asturies.

A manera d'exemplu, caltiénense nesti conxuntu de misives les notes manuscrites nes que Severo Ochoa redactó l'epitafiu pa la so propia

Nota de prensa

sepultura y que diz: “Aquí yacen Carmen y Severo Ochoa, unidos toda una vida por el amor, ahora eternamente vinculados por la muerte”.

L'adquisición realizóse por un importe de 70.000 euros, afaciéndose a los criterios de valoración establecíos pol equipu espertu del Ministeriu de Cultura y del Archivu Históricu d'Asturies. El caltenimientu d'esti archivu nel Principáu va dexar investigar y divulgar facetes desconocíes de Severo Ochoa, complementando los fondos existentes sobre la so vida y obra.

Esti fondu documental entrególu en vida Severo Ochoa al periodista asturianu Marino Gómez-Santos, que yera amigu y biógrafu del científicu, pal so usu na elaboración de la so biografía y na divulgación y conocencia de la so vida y obra a les xeneraciones futures.

Estos documentos pasaron a formar parte de la biblioteca personal de Marino Gómez-Santos. Agora, del fiu d'esti biógrafu y periodista adquirió'l Principáu la correspondencia mentada.

Una ayalga documental y sentimental p'Asturies

La incorporación d'esti epistolariu al Archivu Históricu d'Asturies representa un pasu significativu p'arriquecer el patrimoniu documental de la comunidá autónoma. Esta correspondencia ufierta una visión más íntima y personal del famosu científicu asturianu y dexa averar a les xeneraciones presentes y futures una parte fundamental del so heriedu humanu y profesional.

L'adquisición foi posible gracias al trabayu de la Consejería de Cultura, Política Llingüística y Deporte al traviés de la llexislación en materia de Patrimoniu Históricu. Esti procesu asegura que los bienes documentales d'interés históricu permanezan accesibles al públicu y baxo la custodia d'instituciones públiques.

Con esta adquisición, la consejería garantiza l'accesu públicu al epistolariu y quier empecipiar proyectos que faciliten la so consulta y preservación, fomentando la investigación académica y la divulgación d'un heriedu fundamental pa la historia d'Asturies y de la ciencia universal.